

# Poli'a Taitusi

## Avonkremin'nea Naneke

---

### Musenke

**1** <sup>1</sup>Anumzamofu erizampi nagra Poli'na kina hu'nena, Jisas Kraisi aposol ne'mo'na, Anumzamo huhampri zamante'nea vahe zamentinti zamazeri hampo'na nehanuge'za tamage antahizamofu amage'nente'za, anumzamofu (godly) avu'avapi fatgo hu'za mani'nesageno, <sup>2</sup>manivava asimu fore hanigu tamentinti nehuta avega antesune. Havige osu Anumzamo ama mopa fore osu'negeno, korapa huvempa hunte'neane. <sup>3</sup>Hianagi Agra hunte'nea kna efore higeno, ke'amo eama higeno, mono ke hu'zana nagri hunantege'na, Anumza Tzahu ne'mofu (Savior) kasege'afi nehue.

<sup>4</sup>Taitusiga tamage mofavre'nimoka, mago'ke tamentinti nehu'a ne'mokarega ama avona kre negamue,

Arimpa fruzane, asunku'zanena, Anumza Nerfantegati ene, Kraisi Jisasi tazahunu taguvazi ne'mo'a asunkuzama'aretira karimpa frua kamigahie.

### Taitusiga Kritima eri'za erisana naneke

<sup>5</sup>Nagrama Kritima katre'na vu'noana amanahure, kagra inazama vgaore'nesia zana eri fatgo hunka, mono nonte vugota vahera (elda) magoke magoke kumate nagrama kasamisure zamazeri otitere huo. <sup>6</sup>Hanki mono kva vahe'ma zamazeri otisunka, hazenke'a omane, magoke a' ante'nesia vahe, mofavre zga'amo zamentinti nehina, ke amge'a nentesageno, mofavre zga'agu hazenke nehaze huza nosnia vahe azeri otio. <sup>7</sup>E'igu mono kva vahera hazenke'a omneno, na'ankure Anumzamofu erizante kegva hugahie. Agra'a avesi'za ovaririno, ame huno rimpa aka oheno, aka tinte negia oneno, ke hakare osuno, havi kanteti feno e'norisia vahe azeri otigahane. <sup>8</sup>Hu'neanagi vaheku vhaku'ma nehuno, knare'zanku avenesino, agra'a mani'za kegva nehuno, fatgo avu'ava nehuno, mani otge nehuno, ke amage' nenteno, <sup>9</sup>tamage kema husmi'naza kere amentinti nehuno, agra mago'amokizmia so'e ke nezmasmino, huhaviza hanamokizmi'a zamazeri fatgo nehuno, zamaverihugahie.

<sup>10</sup>Na'ankure maka vahe'mo'za vugote'naza vahe kea ha' renente'za, rumokizmigu krunage nehu'za rezmatga nehzana Jiu nagama vene'ne zamufa tga nehaza naga'ene tragote'naza vahe'mo'za anara nehaze. <sup>11</sup>Zamasminke'za zamagira hamunki'za maniho, na'ankure zamagra maka famo, tramena havi kefinti huzmasmi'za tamage kefintira, zamazeri havi kampi nezmatraze. Zamagra zgo erinaku ana nehaze. <sup>12</sup>Mago Kriti ne' amu'no zamafi korapa kasnampa ne' (profet) mani'nea ne'mo, zamagriku amanage hu'ne, Kriti vahe'mo'za maka zupa havigege nehu'za afi' zgagfagna hu'za mani'naze. Feru vahe mani'ne'za, zamagra zamarimpa eri avite zanku'ke nehaze. <sup>13</sup>Ama kea tamage naneke, hu'negu hampo'na kefinti huge'za, zamentintifina fatgo huza mani'ne'za, <sup>14</sup>Jiu vahe'mokizmi kanihe kere'ene, kase ke zamirera, tamagesa antahiozmiho zamagra tamage kea zamefi humi'za novaririze. <sup>15</sup>Tamage, hakare veamo'za avusesema hu'nenageno'a hakare zamo'a avusesese hu'ne. Hianagi zamentinti osu namokizmi'a, mago zamo'a avusesese osu'ne. Tmage zamagu zamagesamo ene antahintahi zamimo'a haviza hu'ne. <sup>16</sup>Zamagra Anumzamofona antahita keta hu'none hu'za zamagitetira nehaze. Hu'nazanagi, mani'zazmifina zamagra zamefi Agrira hunemize. Zamuzma antaza zamo'a kasri'ne, kea amage' onte'za, mago knare'za hugara osu'naze.

### Knare avu'avapi rempi huzmisia naneke

**2** <sup>1</sup>Hianagi kagrama rempi huzmisanana, tamage kema hu'nesia ke'age (doctrine) huzamasmio. <sup>2</sup>Ranra venenea rempi huzamige'za, fru kefinti kea antemse'za ranke osu'za, knare zmavuzmava nehu'za, knare zamagu'zamagesa antahiho. Hankave zamentinti nehu'za vaheku zamesi nezmante'za, kragogo onkiza hanaveti'za maniho.

<sup>3</sup>Ana zanke hunka ranra a'ne rempi huzamige'za, mikaza hanafina Anumzamofa agorga mani'ne'za, vahe agenke osu' aka timo'a zamazeri havia osnige'za knare'za rempi huzamiho. <sup>4</sup>Ana nehu'za zamagra zahufa a'ne nagara zamumro antesage'za, ve' zmine, mofavre zaminena zamesi zmantegahaze. <sup>5</sup>Knare zamagu'zamagesa nentahiza avusesese hu'za mani'ne'za, vaheku vhaku nehu'za, nezme agorga'a mani'nesage'za nege'za Anumzamofa nanekea huhaviza osugahaze.

### Nehzave'mokizmi naneke

<sup>6</sup>Anahu kna hunka nehazave nagara zamumro antege'za, kegva hu'za maniho. <sup>7</sup>Hakare'zama hanampina knare avu'ava huzamio. Huzameri hanampina zokago vakago osunka tamage ke'age nehunka, <sup>8</sup>tamage ke'age huzamasmigeno mago'mo'a huhaviza huoganteno. E'ina hanankeno aza'o huhaviza hugantesimo'a agzegu hugahie. Na'ankure zamagra havigema hurante zankura hakregahaze.

<sup>9</sup>Kazokzo eri'za vahera rempi huzamige'za mika'zama hanafina kva vahe'mokizmi zamagorga mani'ne'za zamazeri muse nehu'za, ke nona'a huozmante'za, <sup>10</sup>mago'zazamia kumzana oseho. Hagi eri'zana antahizami'are erifatgo nehageno, e'i anazamo Anumza tzahu ne'mofo mani'za huzmerisage'za nege'za, mono nontahisaza kva vahe'mozane, megi'a vahe'mo'za zamagu'a rukrahe hugahaze.

<sup>11</sup>Hu'neanagi Anumzamofa asunku zamo vahe'avare'zana hakare vahete erino efore hu'ne. <sup>12</sup>Tagri rempi huramino mono ontahi avu'avazane, ama mopafi zanku avesi'zanena atreho nehuno, hagi tmufa kva huta, fatgo huta anumza (godly) avu'avate ama kna'afina maniho, <sup>13</sup>ana knama esigu avega anteneta muse nehune, tusi'a msa'afi efore hanigu, Ra Anumzantima, Tzahu ne' Kraisi Jisasi esigu avega ante'none. <sup>14</sup>Tagriku huno Agra'a avufga atreno kefo'zampinti miza seranteno tvare atre'ne, Agri'a vahere huno sese huranteno, tvare Agrarega tante'negu, muse nehuta knare'zanke hanune.

<sup>15</sup>Mika'zana kagripi hampo'na huno me'neanki rempi hunezminka, hampo'na tinka nezmasminka, zamazeri fatgo nehuge'za, kagriku amne vahere hu'za osiho.

### Monopi omani vahe'mokizmi zamerisana avu'avamofa naneke

**3** <sup>1</sup>Kagra vahera huzmageza huge'za, ugagota huno kva hu'nesia nero, kamanifi agi me'nesia ne'mo hania kea amage' ante'za mani'ne'za, knare'zama hu'zanku trohu'za maka'zupa maniho. <sup>2</sup>Zamagra mago mofonkura amefiga'a kea huonte'za, agazone zampi nemni'za, zamarimpa fru hu'za mani'ne'za, maka vahera agazone huzmanteho,

<sup>3</sup>Korapara mago'a knafina tagra'neana, haviza huta knare osuta negi neneta, ke ru hanentagita, havige reravatga hzageta, kefo zamofa avu'avapi kina hu'neta, vahe'mofo zanku kersane nehuta, vahe antahi haviza hunezmanteta, tagrati antahi haviza ohu ahu hu'none. Vahe zamatagri naneke nehunkeno,

<sup>4</sup>Anumzama, tagri Tzahu ne'mofo Agri'a knare muse'zane, avesi'zanemo eama hu'ne. <sup>5</sup>Agrama tza hu'neana, knare fatgozama hu'na zankure huno tza osu'ne, hanki Agra'a asunku huranteno tza hu'ne. Agrama tza hu'neana sese huranteno, tazeri ksefa mofavre seranteno Ruotge Avamuteti tazeri ksefa hu'ne. <sup>6</sup>Anama hu'neana Jisasi Kraisi tzahu ne', Agripi Avamura azeri usasi okino tagi tregeno e'ne. <sup>7</sup>Hu'neankita tahokeheno asunku zama'areti, kumpinti tazeri fatgo hu'negu huhamprima tantegeta avegama ante'nona mani'vava mani'zana erigahune. <sup>8</sup>Ama'na nanekea antahi ankerenka, antahi ani' hanana naneke nehue. Hagi amama ksami'nua nanekea kagra hanavetinka vahera zamasmige'za, Anumzamofonte zamagu'a nentesamo'za kva hu'ne'za knare zanke'za hugahaze. Ama zamo'a knare'za fore nehuno, vahera zamaza hugahie.

<sup>9</sup>Hu'neanagi, antahi'za omne vahe kna hunka havi kegura fra vazige, korapa zamagehe'za forehu anante anante hu'za e'naza vahe zamagireku ene Juda vahe kase kegura fra ovazio. Na'ankure e'i anazamo'a mago knare'zana erifore osuno, haviza eri fore hugahie. <sup>10</sup>Hanki tmazeri refko huku hnimofona pusante agesa eritenka, anante mago'ene avumro antegenoma kema ontahisigenka, anantera mago'zana osunka kmagena humio. <sup>11</sup>Kagra e'inahu vahera kumi' vahe mani'ne hunka antahinka kenka hugahane, agra'a kefoza hiazamo azeri haviza nehie.

### Huvhare naneke

<sup>12</sup>Atemasimpi, Tikikusino hunte'sugenoma kagritega erizanka'a kza huku esnigenka, ame hunka nagritega Nikopolisi kumate eno, na'ankure zasi ko'ma atania knafina, ana kumate umaniku nagesa nentahue.

<sup>13</sup>Hanavetinka Zenasi ke refkohu (lawyer) ne'ene, Apolosi kiznia ka vu zaznifina znaza hugeke magozankura upara osi'o. <sup>14</sup>Tagri vahe'mo'za knare'za hu'zanku zamagesa nentahi'za, mani'za zamifi atupa hu'ne'za zamaza hania zanku hanaveti'za eri fore nehu'za, ferura amnea omniho.

<sup>15</sup>Maka nigrane nemnimo'za musenke hurmantaze. Zamesima nerante'za, zamentinti nehza vahetega musenke vie. Anumzamofa asunku'zamo tamagra ne megahie. Tamage.